

十二月

G5-12-001

复丁雨生中丞^①

光绪五年十二月初一日

雨生仁弟大人阁下：

十月二十二日交唐景星寄去一函，并次等参茸各件，谅已达到。昨奉十月二十四日手书抄件，敬悉一切。尊体复发旧病，十数日粒米未进，乃服大黄、石膏、羚羊等剂而解。岂衰年尚有实火，需此峻品，蒙滋惑焉。凉药重服，病即已而气体恐难遽复，深为惦系，望加意培补为要。参茸近不得佳者，人参尤少。据洋医云，西国铁酒、鱼油，专补血气，视参力百倍。鄙夫妇、次儿，日以铁酒三小杯，常服精力大进。马松圃久病几死，用否杏酪和鱼油服之，近则精神大旺，皆其确证。执事何不托人在香港大药房购此两种试服，胜于远地购求真参多矣。夏间内子病危，赖男女三洋医治之立效。至今该医尚月贴数百金在津施诊，前所荐即其人也。今始知中国医术如政术，全是虚伪骗人。西国机器兵法，固高出华人之上，即医术亦相悬甚矣。外科较内科尤为神妙，如足疾沉痾，非若辈不起也。来春二三月，务搭轮舟来津就诊，勿参以华医华药，必能霍然，不徒为谋干两江也。幼帅竟自仙去，独作完人。岷庄乞养，疏词决绝，似已无意出山，廷推必令量移，或谓吴江为水部预留地步，亦未可知。外间众论，则执事宜首屈一指，吾无间焉，唯前奉会办之命，坚卧不行，朝廷疑其偃蹇。玉阶、少仲却未明言，有敝幕赴引，晤其同乡，枢垣领班，谓上密谈丁某不出，岂洋务即不办。意旨可知。都人毁誉参半，悠悠本无定评，若幡然入覲，江左舍公其谁，鄙人更赖有同志之赞助也。伊犁议复敝疏，记曾抄稿奉呈。地山过此细谈，约已尽押，订明年八月在俄京互换，并未另有活动之语。昨因言者纷争，奉旨先行交部严议，开缺、约章，交六部九卿妥议，惜无令俄驻京使臣会同议复字样，虽举国攘臂而起，其有益耶。政府专欲诿过于人，而不计此事之如何结局，深可骇叹。振轩移粤督，一时尚未履新，可为珂乡得人庆。大疏早经抄发，慷慨直陈，切中事理，其如听者藐藐何。昨议复札内，约有异同，而引重鼎言，加以咏叹，业奉留中，殊莫测高深耳。都下言庞事杂，近有纠弹万藕舫、荣仲华，皆派查办，明中叶攻讦之风又起。然即去万、荣辈数十人，何济于事，犹吾崔子也。匆匆，复颂年禧。不宣。鸿章顿。

① 原稿无年代，以张树声出任两广总督事在光绪五年，姑置于此。